

Katto katne ki khlur ialehkai phutbol ba kynsai kiba lah ban mih madan ha ka sien ba khatduh ha ka FIFA World Cup

USA, Jylliew 11: Katba ka FIFA World Cup 2026 ka la sdang hynne ka shiteg miet, ki paid nongkyrshan ha kylleng ka pyrthei kin pynkreh na ka bynta ki jingialehkai ki ban sah jingkyrnmaw bad kiba kyrpang, hynrei nalar ka jingiakhun ban ioh ia ka khusnam kaba heh tam jong ka phutbol, kane ka lypmung kan sakhi ruh ia ka jingialehkai kaba khatduh jong katto katne ki khlur ialehkai kiba pawnam.

Na ka bynta ki katto katne ki kyrnteng kiba pawnam tam jong ka phutbol, kane ka World Cup ka lah ban long ka lynnong ba khatduh jong ki katto katne kiba la ai mynsiem ia ki million ngut bad kiba la saindur ia ka pateng jong ka phutbol. Don kiba la dep ban rah ia kane ka khusnam, kiwei pat ki dang iakhun ban ioh mad ia ka jingjop, hynrei baroh kin mih madan da kaba tip ba kane ka lah ban dei kaba khatduh na ka bynta jong ki ha ka lypmung ialehkai kaba khraw tam jong ka pyrthei.

Hangne ki don san ngut ki nongialehkai phutbol kiba lah ban ialehkai ia ka FIFA World Cup kaba khatduh jong ki.

U Lionel Messi (Argentina)
Hadien ba u la pyndep ia ka jingangnud ba kongsan tam jong ka phutbol da kaba ialam ia ka Argentina sha ka nam lahdud jong ka World Cup ha u snem 2022, u Lionel Messi un wanphai biang na ka bynta kaei kaba la khmih lynti ba kan dei ka jingialehkai ba khatduh jong u ha kane ka lypmung.

U Messi, uba la jop 8 sien ia ka Ballon d'Or, u la pyntuk noh ia ki jingiatia ba la neh da ki phew snem da kaba rah ia ka khusnam lahdud ha Qatar bad mynta u don ka lad ban ioh mad sa kawei pat ka jingjop ka ban pynsahnam ha ka histori, kata ka long ban iarap ia ka Argentina ban long ka ri kaba kyngkong naduh ka Brazil ha u snem 1962 ban iada ia ka burom lahdud jong ka World Cup.

Wat lada ngin nym bishar ia ka jingiaid lynti jong ka



Argentina haduh katno kan poi ha kane ka World Cup mynta u snem, hynrei ym lah ban kyntait ba u Messi u ladeb ban pynskhem ialade kum uwei na ki nongialehkai ba khraw tam ha ka histori jong ka phutbol.

U Cristiano Ronaldo (Portugal)
Tang khyndiat eh ki nongialehkai kiba la saindur ialade ban neh slem kumba long u Cristiano Ronaldo. Une u khlur ialehkai ba pawnam jong ka Portugal u la ioh mad ia ka jingim ialehkai kaba ilan bha na ka bynta ka ri kaba la neh palat arphew snem, bad haduh mynta u dang iai long u nongialehkai ba kongsan tam jong ka ri jong u.

Hynrei ka khusnam kaba kongsan kaba dang jah na ka jingim ialehkai jong u Ronaldo ka sah satang ka World Cup, kaba pynlong ia u snem 2026 kum ka lad kaba khatduh ban

pyndep ia ka jingangnud ban jop ia ka khusnam kaba khraw tam jong ka phutbol. Ha ka rta kaba 41 snem, u rung sha kane ka lypmung da kaba tip ba man la ka jingialehkai ka lah ban long kaba khatduh na ka bynta jong u ha ka lypmung phutbol jong ka World Cup.

U Luka Modric (Croatia)
U Luka Modric u la long ka shap jong ka jingkiev jong ka Croatia kum ka kynhun kaba khilai bor ha ka phutbol. Naduh ba u la ialam ia ka ri jong u sha ka phainal jong u snem 2018 haduh kawei pat ka sienjam ban pyndep ha ka kyrdan ba lai ha u snem 2022, une u rangialehkai pdeng madan u la bteng ban long u budlum ha ki jingialehkai ba kongsan na ka bynta ka ri jong u.

Mynta ha ka rta ba 40 snem, u Modric u dang iai long u

nongialam bad nongialehkai ba kynsai jong ka Croatia. Ka jingialehkai kaba khilai mynta u snem 2026 kan long ka jingpynkut kaba kyrpang na bynta uwei na ki nongialehkai pdeng ba kynsai tam ba ka phutbol ka la sakhi.

U Thomas Muller (Germany)
U nongialehkai uba la jop ia ka World Cup ha u snem 2014 bad uwei na ki nongialehkai ba kynsai jong ka Germany, u Thomas Müller u la tei ia ka nam ban kiew shaphrang wat hapdeng ki jingeh.

U Neymar (Brazil)
U Neymar, u rangialehkai ba shakhmat jong ka Brazil, u la dep pynpaw ba ka FIFA World Cup 2026, kan dei kaba khatduh eh ha ka jingim jong u. Une u rangialehkai ba 34 snem ka rta, u la pynpaw ia kane halor ka jingthoh ha ka social media na ka FIFA kaba pyni ia ki dur jong ka jingialehkai jong u Neymar ryngkat bad ki kyntien "Ngi la peit ia u ba u la san." "Ka jingialehkai kaba khatduh," la jubab une u rangialehkai ka Santos ha ka comments section.

U Neymar, u nongialehkai ba bun kol tam jong ka Brazil, da kaba thep 79 kol ha ki 128 tylli ki jingialehkai, um shym la ialehkai na ka bynta ka Brazil naduh ba u la mynsaw ha u bnai Risaw jong u snem 2023. Hynrei, u la shah pynrung ha ka kynhun bad u kyrmen ban pynkylla ia kiei kiei na ka bynta ka Brazil, kaba dang iakhun ban rah ia ka nam lahdud kaba hynriew ha ka FIFA World Cup hadien 24 snem.

Sei ka MAA ia ka kynhun kaba don 21 ngut ban shim bynta ha ka Indian Athletics Series-11

SHILLONG, Jylliew 11: Ka Meghalaya Athletics Association ka la phah ia ka kynhun kaba don 21 ngut ki nongialehkai ban iashim bynta ha ka Indian Athletics Series-11 ka ban long ha nongbah Kolkata, West Bengal. Kane ka lypmung kan

sdang ha ka 15 tarik mynta u bnai Jylliew, 2026 bad ia ki jingialehkai yn pynlong ha Salt Lake Stadium.

Kane ka lypmung ba la pynlong hapoh ka jingpeit jong ka Athletics Federation of India (AFI), ka kyntup ia ki jingialehkai bapther bapther ba

ia dei bad ki track & field event na ka bynta ki nongialehkai ba la kham rangbah.

Ka jingleit shim bynta jong ka kynhun sha kane ka lypmung ka long ruh shi bynta jong ka jingpynkreh na ka bynta ka National Games kaba 39, ia kaba ka jylla Meghalaya

kan sa ioh ban pynlong ha u snem ban wan.

Ia ka kynhun yn synran lang da 6 ngut ki Team Official, kiba kyntup ia u Biningstar Lyngkhoi, Amarveer Singh, Deepak Kumar, Sumit Kumar, Amin Kharkongor bad ka Fidelia Sun.

Kine ki long ki kyrnteng jong ki nongialehkai ka jylla ryngkat ki jingialehkai ba kin iakhun:	
Shynrang	Daniel L Wahlang (5000m)
Bettingstar N Sangma (100m & 200m)	Marshall Wanniang (5000m)
Yiarmawill Rymbai (100m & 200m)	Hepstarly Lyngkhoi (5000m)
Donbok Shabong (100m & 200m)	Wankymen L Mawphlang (5000m)
Kimkim Ch Momin (100m & 200m)	Mebanshan Mawthoh (5000m)
Banraplang Lapang (100m & 200m)	
Henry Yoga A Sangma (100m & 200m)	Kynthei
Renaldi Dhar (100m & 200m)	Damika R Lyngdoh (100m & 200m)
Lastly Suchiang (100m & 400m)	Phibakmen Rynghang (100m)
Jebirth Ch Momin (Long Jump)	Balasiewdor Pathaw (100m)
Doniwel Langrin (Long Jump)	Marqueenless Ramsiej (5000m)
Hasebinson Marwein (5000m)	Eliam Bonkam G Sangma (5000m)



Ka kynhun ki nongialehkai Athletic ka jylla ki ban iashim bynta sha ka Indian Athletics Series-11 ka ban long ha nongbah Kolkata. (Dur : MAA)

SSA U-20 4th Division: Mad jingjop ka Mawshbuit, Nongkseh Utd bad ka Nongpiur

SHILLONG, Jylliew 11: Ka Mawshbuit SC, ka Nongkseh United FC bad ka Nongpiur SC ki la ioh mad jingjop ha la ki jong ki jingialehkai jong ka Group D ha ka lypmung U-20 4th Division 2026 ba la pyniaid da ka Shillong Sports Association, hynne ka sngi Palei ha Polo.

Ka Mawshbuit SC ka la pynliem noh da 3-1 ia ka New Challenger FC. U Romario Mawrie (14 & 62'min) bad u Aibanjop Sun (40') ki la pynkhihjar na ka bynta ka Mawshbuit, katba u Dame Hajong Mawlieh (26') u la thep kawei na bynta ka New Challenger.

Nangta ka Nongkseh United FC ka la jop 1-0 ia ka Mawphlang SC, lyngba ka kol jong u Gerrad Dakerlang Sun ha ka minit kaba 38.

Ha MFA Ground, ka Nongpiur ka la jop da 3-0 ia ka Pynthorbah SC, lyngba ki kol jong u Rishanskhem Langstieh (43'), u Mepynsgewbha Nongsiej (78') bad u Andrew Tangsong (80+6').

Ki jingialehkai ha kane ka sngi Thohtieng (12.06.2026); Por 1 baje mynsngi, ka Diengpasoh SC pyrsah ia ka Mawnianglah Youth SC, Por 4 baje nohpai sngi, ka Umiew S&CO pyrsah ia ka Laitkroh SC ha SSA Stadium. Nangta ha MFA Ground, Por 1 baje mynsngi ka Seila Sap F&CC kan aireng pyrsah ia ka Summit Academy.

Rakhe ka MTA ia ka jingdap 50 snem ka jingshakri u Master U.N. Shukla

Shah pynkup burom 17 ngut ki nongialehkai da ka Kukkiwon Black Belt

SHILLONG, Jylliew 10: Ka Meghalaya Taekwondo Sport Association (MTSA), ha ka jingiatreilang bad ka Taekwondo Institute of Meghalaya (TIM), ka la lah ban pynlong ia ka jingialang kaba kyrpang ha ka 07 tarik u Jylliew, 2026, kum shi bynta ban rakhe ia ka jingdap 50 snem jong ka jingshakri u Master U.N. Shukla ha ka jingialehkai Taekwondo.

Ia kane ka program la pynlong ha Babu Mani Singh Gurung Auditorium, Gorkha Patshala Higher Secondary, Shillong.

U U.N. Shukla, u dei u wei na ki nongsdang ia ka jingialehkai Martial Arts ha India bad u dei u nongjop takma ba nyngkong eh jong ka jylla (1982), International Medallist (1983/84), u International Referee, International Master, bad uba la ioh ia ka kyrdan 5th Dan Black Belt na ka Kukkiwon, South

Korea. Kane ka jingialang ka pynkup burom ia ki jingnoh synniang kiba khraw jong u sha ka jingpynroi bad jingkiev jong ka Taekwondo ha ka thaii naduh u snem 1976. Ka jingrakhe ka la kut da ka jingialang sam khusnam ia ki nongialehkai kiba la ioh ia ka kyrdan 'Kukkiwon Black Belt', ha kaba 17 ngut ki saml na Meghalaya kila shah pynkup burom.

Ki nongialehkai kiba la iohpdang ia ka 1st Dan Award ki long u Kiran Shekhawat, Retika Paul, Soumyajeet Paul, Ranchita Paul, Neha Shukla, Anant Narayan Shukla, Herwood Thabab, Vastab Sarkar, Akansh Barua, bad u Manvik Agarwal.

Kiba iohpdang ia ka 2nd Dan Award ki long; P.G. Jyrwa, Ravi Thabab, Shahjahan Hussain, Aman Shukla, bad Subir Paul.

Nangta ar ngut ki la iohpdang ia ka 3rd Dan Award, Amal Chakravorty bad Prem Narayan Shukla.

Na ka liang jong ka Association ka la ai khublei kyrpang ia baroh ki nongialehkai kiba la jop bad pynpaw ka jingsngewnguh kaba khraw ia kiba ha iing ha sem bad ki nongkyrshan, na ka bynta ka jingkyrshan bad jingshaniah ba khlem sangeh jong ki ha kine ki snem.



Maham ka Iran ban sangeh ia ki jingialehkai lada mih ki jingpyrta kyntoh pyrshah ia ka kynhun

NEW DELHI, Jylliew 10: Ka Iran, ka la maham ba ka lah ban sangeh noh ia ki jingialehkai jong ka ha ka World Cup, lada ki don ki lama ba khlem jingbit lane ki jingpyrta kiba kyntoh pyrshah ia ka kynhun hapoh ka madan ialehkai, katkum ka khubor ba la iohlum jong ka Iran ba la pynsgew da u myntri ka tnad ialehkai jong katei ka ri, u Ahmad Donyamali.

Kane ka jingmaham ka la wan tang katto katne sngi shuwa ba ka Iran kan sdang ia ka jingialehkai jong ka ha ka Group G ha kane ka World Cup, kaban sdang ha kane ka sngi Thohtieng. Ka Iran kan iakhun pyrshah ia ka New Zealand ha Los Angeles ha ka 16 tarik Jylliew, ka Belgium ha kajuha ka madan ha ka 22 tarik Jylliew, bad ia ka Egypt ha Seattle ha ka 27 tarik Jylliew.

"Ngi la pyntip sha ka FIFA ba lada wanrah ia ki lama bym dei kiba thikna ne pynsawa ia ki jingpyrta ba pyrshah ia ka kynhun ialehkai hapoh madan ba ka Iran ka ialehkai ha ka World Cup, la thikna ba u

nongpyniaid jong ka kynhun un kitkhlieh ban pynsangeh ia ka jingialehkai," la ong u Donyamali ha ka sngi Balang, katkum ki tyllong khubor ba la iohlum. Une u Myntri u la bynrap ba ki nongpyniaid jong ka Iran ki la ioh ia ki jingpynthikna halor ka jingialehkai groupstage ba khatduh jong ka kynhun. "Ngi la ioh ka jingpynthikna ba kan ym don kano kano ka jingia kaba pynthut hapoh madan ha ka por ba iakhun pyrshah ia ka Egypt," u la ong.

Kine ki jingkren ki la wan hapdeng ka jingbishar bniah kaba nang jur halor ka

jingishim bynta jong ka Iran ha kane ka lypmung. Ha u bnai iaiong, ki nongiakhih, ki la ia lum lang shabar jong ka FIFA Congress ha Vancouver bad ki la dawwa ia ka Iran ban shah weng noh na ka World Cup. Ki la kyntoh ba katei ka kynhun ha mihkhmat ia ka kynhun shipai jong ka ri Islam lane ka 'Islamic Revolutionary Guard Corps' ban ia ki paidbah Iran.

Ka jingiakhun jong ka Iran pyrshah ia ka Egypt ruh ka la shah peit khmat hadien ba ki synjuk ialehkai phutbol jong baroh ar tylli ki ri ki la kyntu ia ka FIFA ban khanglad ia ki kam kiba iadei bad ka LGBTQ+ Pride

ha kylleng ki jaka ialehkai. Ki nongpyniaid na ka thaii ki la buh ia kane ka jingialehkai kum ka "Pride Match" na ka bynta ka jingrakhe sngi kut taiew jong ki LGBTQ+ lane ki 'Hijra' ha Seattle.

Shabar madan, ka Iran ka la ia kynduh ia ki katto katne ki jingeh shuwa ka jingialehkai. Ka synjuk phutbol jong ka Iran ka la pynpaw ba ka la shah weng noh ia ka jingai tiket jong ka tang katto katne sngi shuwa ka World Cup. Kane ka la pynlong ia ki nongkyrshan, kiba la dep ban thmu ban wan, ba kin nym lah ban ioh rung sha ki jingialehkai.

Kane ka kynhun ka dang kilanmet mynta ha Tijuana, Mexico, bad ka la ia kynduh ruh ia ki jingeh ha ka leit ka wan namar ka jingiakynad kaba dang iaid shakhmat ha ka saii hima sima. Ka tnad pahara jong ka U.S. dang shen ka la pynthikna ba ia ka kynhun ialehkai jong ka Iran yn shah ban rung sha America shisngi shuwa man la ka jingialehkai World Cup jong ka.



Yn pynlong ka AFI ia ka Indian Athletic Awards ba nyngkong eh ha ka 20 tarik Jylliew ha New Delhi

NEW DELHI, Jylliew 11: Ka Athletics Federation of India (AFI) kan pynlong ia ka jingialang pynkup burom ia ki nongialehkai lane ka 'Indian Athletic Awards' ba nyngkong eh ha ka 20 tarik Jylliew ha Delhi, kum ka jingithuh ia ka jingitbit ki nongialehkai athletic ka ri India.

Ia kane ka jingialang la thmu kum ka rynsan ban burom ia ki nongialehkai ba mynta bad ofisim, ki coach, ki technical official, ki nonghikai, ki synjuk ialehkai jong ki jylla, ki nongkyrshan, bad baroh kiwei pat ki nongshim bynta kiba ka jingnoh synniang jong ki ka la don ka bynta kaba kongsan ha ka jingjop kaba nang kiew jong ka India ha ki rynsan ialehkai athletic ha ka pyrthei, la ong ka AFI ha ka jingpynbna.

Kane ka jingialang kan pynkup burom ia ka jingitbit ha kylleng ki 10 tylli ki jait khusnam, kyntup ia ki khusnam na ka bynta ka

Lifetime Achievement Awards, Best Athlete (Male & Female), Best Coach, Best Technical Official, Best State Association bad Best State Supporting Athletics.

La khmihlynti ba bun ki nongialehkai ba pawnam jong ka ri India kiba mynta bad kiba mynshuwa kin don bynta ha kane ka jingialang, kaba pynlong ia ka kum ka jingialang kaba kongsan na ka bynta ki nongialehkai athletic jong ka ri India bad ka jingrakhe ia ka jingkiev stet jong kane ka jingialehkai ha ka ri.

Ki khusnam ban sam ha kane ka sngi ki kyntup

